

欽定明史

卷二百九十八之三百五

欽定四庫全書

明史卷二百九十八

列傳一百八十六

總裁官總理事務經筵講官少保兼太子太保保和殿大學士兼管吏部戶部尚書事加六級張廷玉等奉

敕修

隱逸

韓愈言蹇之六二曰王臣蹇蹇而蠱之上九曰高尚其事由所居之時不一而所蹈之德不同夫聖賢以用世爲心而逸民以肥遯爲節豈性分實然亦各行其志而已明太祖興禮儒士聘文學搜求巖穴側席幽人後置不爲君用之罰然韜迹自遠者亦不乏人迨中葉承平聲教淪浹巍科顯爵頓天網以羅英俊民之秀者無不觀國光而賓王廷矣其抱瓊材蘊積學稿形泉石絕意當世者靡得而稱焉由是觀之世道升降之端係所遭逢豈非其時爲之哉凡徵聘所及文學行誼可稱者已散見諸傳茲取貞節超邁者數人作隱逸傳

張介福

倪瓚

徐勣

楊恆

陳洞

楊引

吳海

劉閔

楊黼

孫一元

沈周

陳繼儒

張介福字子祺自懷慶徙吳中少受學於許衡二親早終遂無仕進意家貧冬不能具夾襦或遺以紵絮

不受纖介必以禮張士誠入吳有卒犯其家危坐不爲起刀斫面仆地醒復取冠戴之坐自若卒怪以爲異物走去介福恐發其先墓往廬焉士誠聞而欲致之不可使其弟往問答曰無樂亂無貪天禍無忘國家饋之力辭已病革謂其友曰吾志希古人未能也惟無汚於時庶幾哉遂卒

倪瓚字元鎮無錫人也家雄於貲工詩善書畫四方名士日至其門所居有閣曰清閟幽迥絕塵藏書數千卷皆手自勘定古鼎法書名琴奇畫陳列左右四時卉木縈繞其外高木修篁蔚然深秀故自號雲林居士時與客觴咏其中爲人有濯癖盟濯不離手俗客造廬比去必洗滌其處求縑素者踵至瓚亦時應之至正初海內無事忽散其貲給親故人咸怪之未幾兵興富家悉被禍而瓚扁舟箬笠往來震澤三泖間獨不罹患張士誠累欲鈎致之逃漁舟以免其弟士信以幣乞畫瓚又斥去士信恚他日從賓客遊湖上聞異香出葭葦間疑爲瓚也物色漁舟中果得之扶幾斃終無一言及吳平瓚年七十八黃冠野服混迹編氓洪武七年卒年七十四

徐舫字方舟桐廬人幼輕俠好擊劍走馬蹴踘旣而悔之習科舉業已復棄去學爲歌詩睦故多詩人唐有方干徐凝李頻施肩吾宋有高師魯滕元秀號睦州詩派舫悉取步驟之旣乃遊四方交其名士詩益工行省參政蘇天爵將薦之舫笑曰吾詩人耳可羈以章紱哉竟避去築室江皋日苦吟於雲烟出沒間

翛然若與世隔因自號滄江散人宋濂劉基葉琛章溢之赴召也舟溯桐江忽有人黃冠鹿裘立江上招基而笑且語侵之基望見急延入舟中琛溢競謹譔各取冠服服之欲載上黟川其人不可乃止濂初未相識以問基曰此徐方舟也濂因起共歡笑酌酒而別舫詩有瑤林滄江二集年六十八丙午春卒於家楊恆字本初諸暨人外族方氏建義塾館四方遊學士恆幼往受諸經輒領其旨要文峻潔有聲郡邑間浦江鄭氏延爲師閏十年退居白鹿山戴櫪冠披羊裘帶經耕烟雨間嘯歌自樂因自號白鹿生太祖旣下浙東命樂鳳知州事鳳請爲州學師恆固讓不起鳳乃命州中子弟卽家問道政有缺失輒貽書咨訪後唐鐸知紹興欲辟起之復固辭宋濂之爲學士也擬薦爲國子師聞不受州郡辟命乃已恆性醇篤與人語出肺肝相示事稍乖名義輒峻言指斥家無儋石而臨財甚介鄉人奉爲楷法焉時有陳洄者義烏人幼治經長通百家言初欲以功名顯旣而隱居戴青霞冠披白鹿裘不復與塵事接所居近大溪多修竹自號竹溪逸民常乘小艇吹短簫吹已叩舷而歌悠然自適宋濂俱爲之傳

楊引吉水人好學能詩文爲宋濂陶安所稱駙馬都尉陸賢從受學入朝舉止端雅太祖喜問誰教者賢以引對立召見賜食他日賢以褻服見引太息曰是其心易我不可久居此矣復以纂修徵亦不就其教學者先操履而後文藝嘗揭論語鄉黨篇示人曰吾教自有養生術安事偃仰吐納爲乃節飲食時動息

迄老視聽不衰既歿安福劉球稱其學探道原文範後世去就出處卓然有陶潛徐穉之風

吳海字朝宗閩縣人元季以學行稱值四方盜起絕意仕進洪武初守臣欲薦諸朝力辭免旣而徵詣史局復力辭嘗言楊墨釋老聖道之賊管商申韓治道之賊稗官野乘正史之賊文詞艷說文章之賊上之人宜敕通經大臣會諸儒定其品目頒之天下民間非此不得輒藏坊市不得輒粥如是數年學者生長不涉異聞其於養德育才豈曰小補因著書一編曰書禍以發明之與永福王翰善翰嘗仕元海數勸之死翰果自裁海教養其子偁卒底成立平居虛懷樂善有規過者欣然立改因顏其齋曰聞過爲文嚴整典雅一歸諸理後學咸宗仰之有聞過齋集行世

劉閔字子賢莆田人生而純慤早孤絕意科舉求古聖賢視躬訓家之法率而行之祖母及父喪未舉斷酒肉違室家訓鄰邑朔望歸則號哭殯所如是三年婦失愛於母出之獨居奉養疾不解衣母或恚怒則整衣竟夕跪榻前祭享奠獻一循古禮鄉人莫不欽重副使羅環立社學搆養親堂延閔爲師提學僉事周孟中捐俸助養知府王弼每祭廟社必延致齋居曰此人在座私意自消置田二十餘畝贍之並受不辭及母歿卽送田還官廬墓三年弟婦求分產閔闔戶自撾婦感悟乃已弘治中僉都御史林俊上言伏見皇太子年踰幼學習處宮中罕接外傳揀教之道似爲未備今請讀侍從諸臣固已簡用然百司衆職

山林隱逸不謂無人以臣所知則禮部侍郎謝鐸太僕少卿儲璫光祿少卿楊廉可備講員其資序未合德行可取者二人則致仕副使曹時中布衣劉閔是也閔臣縣人恭慎醇粹孝行高古日無二粥身無完衣處之晏如監司劉大夏徐貫等恆敬禮之臣謂可禮致時中爲宮僚閔以布衣入侍必能涵育薰陶裨益睿質時不能用其後巡按御史宗彝饒瑋欲援詔例舉閔經明行修閔力辭知府陳效請遂其志榮以學職正德元年遙授儒學訓導

楊黼雲南太和人也好學讀五經皆百遍工篆籀好釋典或勸其應舉笑曰不理性命理外物耶庭前有桂樹縛板樹上題曰桂樓偃仰其中歌詩自得躬耕數畝供甘饈但求親悅不顧餘也注孝經數萬言證羣書根性命字皆小篆所用硯乾將下樓取水硯池忽滿自是爲常時人咸異之父母歿爲傭營葬畢入雞足棲羅漢壁石窟山十餘年壽至八十子孫迎歸一日沐浴令子孫拜曰明日吾行矣果卒

孫一元字太初不知何許人問其邑里曰我秦人也嘗棲太白之巔故號太白山人或曰安化王宗人王坐不軌誅故變姓名避難也一元姿性絕人善爲詩風儀秀朗蹤跡奇譎烏巾白帔攜鐵笛鶴瓢遍遊中原東踰齊魯南涉江淮歷荆抵吳越所至賦詩談神仙論當世事往往傾其座人鉛山費宏罷相訪之杭州南屏山值其晝寢就臥內與語送之及門了不酬答宏出語人曰吾一生未嘗見此人時劉麟以知府

寵歸龍霓以僉事謝政並客湖州與郡人故御史陸崑善而長興吳琬隱居好客三人者並主於其家琬因招一元入社稱茗溪五隱一元買田溪上將老焉舉人施侃雅善一元妻以妻妹張氏生一女而卒年止三十七琬等葬之道場山

沈周字啟南長洲人祖澄永樂間舉人材不就所居曰西莊日置酒款賓人儼之顧仲瑛伯父貞吉父恆吉並抗隱搆有竹居兄弟讀書其中工詩善畫藏獲亦解文墨邑人陳孟賢者陳五經繼之子也周少從之遊得其指授年十一遊南都作百韻詩上巡撫侍郎崔恭面試鳳凰臺賦援筆立就恭大嗟異及長書無所不覽文摹左氏詩擬白居易蘇軾陸游字仿黃庭堅並爲世所愛重尤工於畫評者謂爲明世第一郡守欲薦周賢良周筮易得遯之九五遂決意隱遁所居有水竹亭館之勝圖書鼎彝充牣錯列四方名士過從無虛日風流文采照映一時奉親至孝父歿或勸之仕對曰若不知母氏以我爲命耶奈何離膝下居恆厭入城市於郭外置行窩有事一造之晚年匿跡惟恐不深先後巡撫王恕彭禮咸禮敬之欲留幕下並以母老辭有郡守徵畫工繪屋壁里人疾周者入其姓名遂被攝或勸周謁貴遊以免周曰往役義也謁貴遊不更辱乎卒供役而還已而守入覲銓曹問曰沈先生無恙乎守不知所對漫應曰無恙見內閣李東陽曰沈先生有牘乎守益愕復漫應曰有而未至守出倉皇謁侍郎吳寬問沈先生何人寬備

言其狀詢左右乃書壁生也比還謁周會再拜引咎索飯飯之而去周以母故終身不建遊母年九十九而終周亦八十矣又三年以正德四年卒

陳繼儒字仲醇松江華亭人幼穎異能文章同郡徐階特器重之長爲諸生與董其昌齊名太倉王錫爵招與子衡讀書支硎山王世貞亦雅重繼儒三吳名下士爭欲得爲師友繼儒通明高邁年甫二十九取儒衣冠焚棄之隱居崑山之陽構廟祀二陸草堂數椽焚香晏坐意豁如也時錫山顧憲成講學東林招之謝弗往親亡葬神山麓遂築室東余山杜門著述有終焉之志工詩善文短翰小詞皆極風致兼能繪事又博文強識經史諸子術伎稗官與二氏家言靡不較覈或刺取瑣言僻事詮次成書遠近競相購寫徵請詩文者無虛日性喜獎掖士類屢常滿戶外片言酬應莫不當意去暇則與黃冠老衲窮峯泐之勝吟嘯忘返足跡罕入城市其昌爲築來仲樓招之至黃道周疏稱志尙高雅博學多通不如繼儒其推重如此侍郎沈演及御史給事中諸朝貴先後論薦謂繼儒道高齒茂宜如聘吳與弼故事屢奉詔徵用皆以疾辭卒年八十二自爲遺令纖悉畢具

明史卷一百九十八終

明史卷二百九十九

列傳一百八十七

總裁官總理事務經筵講官保兼太子太保保和殿大學士兼管吏部戶部尚書事加六級張廷玉等奉敕修

方伎

左氏載醫和緩梓慎裨竈史蘇之屬甚詳且核下逮巫祝亦往往張其事以神之論者謂之浮夸似矣而史記傳扁鵲倉公日者龜策至黃石赤松倉海君之流近於神仙荒忽亦備錄不遺范蔚宗乃以方術名傳夫藝人術士匪能登乎道德之途然前民利用亦先聖之緒餘其精者至通神明參造化詎曰小道可觀已乎明初周顥張三丰之屬踪蹟祕幻莫可測識而震動天子要非妄誕共寵者所可幾張中袁珙占驗奇中夫事有非常理所能拘者淺見渺聞不足道也醫與天文皆世業專官亦本周官遺意攻其術者要必博極於古人之書而會通其理沈思獨詣參以考驗不爲私智自用乃足以爲當世而爲後學宗今錄其最異者作方伎傳真人張氏道家者流而世蒙恩澤其事蹟關當代典故撮其大略附於篇

滑壽

葛乾孫

呂復

倪維德

周漢卿

王履

周顥

張中

張三丰

袁珙

戴思恭

盛寅

皇甫仲和

全寅

吳

傑許紳
王綸

凌

雲李玉

李時珍

繆希雍

周述學

張正常

劉淵然等

滑壽字伯仁先世襄城人徙儀真後又徙餘姚幼警敏好學能詩京口王居中名醫也壽從之學授素問難經既卒業請於師曰素問詳矣多錯簡愚將分藏象經度等爲十類類抄而讀之難經又本素問靈樞其間榮衛藏府與夫經絡腧穴辨之博矣而缺誤亦多愚將本其義有注而讀之可乎居中躍然稱善自是壽學日進壽又參會張仲景劉守真李明之三家而會通之所治疾無不中既學鍼法於東平高洞陽嘗言人身六脈雖皆有係屬惟督任二經則苞乎腹背有專穴諸經滿而溢者此則受之宜與十二經並論乃取內經骨空諸論及靈樞篇所述經脈著十四經發揮三卷通考隧穴六百四十有七他如讀傷寒論抄診家樞要痔瘻篇及採諸書本草爲醫韻皆有功於世晚自號櫻盦生江浙間無不知櫻盦生者年七十餘容色如童孺行步蹻捷飲酒無算天台朱右撫其治疾神效者數十事爲作傳故其著述益有稱於世

萬乾孫字可久長洲人父應雷以醫名時北方劉守真張潔古之學未行於南有李姓者中州名醫官吳下與應雷談論大駭歎因授以張劉書自是江南有二家學乾孫體貌魁碩好擊刺戰陣法後折節讀書

兼通陰陽律厯星命之術屢試不偶乃傳父業然不肯爲人治疾或施之輒著奇效名與金華朱丹溪埒富家女病四支痿痺目眩不能食衆醫治罔效乾孫命悉去房中香奩流蘇之屬掘地坎置女其中久之女手足動能出聲投藥一丸明日女自坎中出矣蓋此女嗜香脾爲香氣所蝕故得是症其療病奇中如此

呂復字元膺鄞人少孤貧從師受經後以母病求醫遇名醫衢人鄭禮之遂謹事之因得其古先禁方及色脈藥論諸書試輒有驗乃盡購古今醫書曉夜研究自是出而行世取效若神其於內經素問靈樞本草難經傷寒論脈經脈訣病原論太始天元玉冊元詰六微旨五常政元珠密語中藏經聖濟經等書皆有辨論前代名醫如扁鵲倉公華佗張仲景至張子和李東垣諸家皆有評騭所著有內經或問靈樞經脈箋五色診奇眩切脈樞要運氣圖說養生雜言諸書甚衆浦江戴良採其治效最著者數十事爲醫案歷舉仙居臨海教諭台州教授皆不就

倪維德字仲賢吳縣人祖父皆以醫顯維德幼嗜學已乃業醫以內經爲宗病大觀以來醫者率用裴宗元陳師文和劑局方故方新病多不合乃求金人劉完素張從正李杲三家書讀之出而治疾無不立效周萬戶子八歲昏眊不識饑飽寒暑以土炭自塞其口診之曰此慢脾風也脾藏智脾慢則智短以疏風

助脾劑投之卽愈顧顯卿右耳下生瘰大與首同痛不可忍診之曰此手足少陽經受邪也飲之藥踰月愈劉子正妻病氣厥或哭或笑人以爲祟診之曰兩手脉俱沉胃脘必有所積積則痛問之果然以生熟水導之吐痰涎數升愈盛架閣妻左右肩臂奇癢延及頭面不可禁灼之以艾則暫止診之曰左脉沉右脉浮且盛此滋味過盛所致也投以劑旋愈林仲實以勞得熱疾熱隨日出入爲進退暄盛則增劇夜涼及雨則否如是者二年診之曰此七情內傷陽氣不升陰火漸熾故溫則進涼則退投以東垣內傷之劑亦立愈他所療治多類此常言劉張二氏多主攻李氏惟調護中氣主補蓋隨時推移不得不然故其主方不執一說常患眼科雜出方論無全書著元機啟微又校訂東垣試效方並刊行於世洪武十年卒年七十五

周漢卿松陽人醫兼內外科鍼尤神鄉人蔣仲良左目爲馬所踴睛突出如桃他醫謂係絡已損不可治漢卿封以神膏越三日復故華州陳明達醫十年漢卿視之曰可鍼也爲翻睛刮翳歛然辨五色武城人病胃痛齎擲乞死漢卿納藥於鼻俄噴赤蟲寸許口眼悉具痛旋止馬氏婦有娠十四月不產危且黑漢卿曰此中壘非娠也下之有物如金魚病良已永康人腹疾痼行漢卿解衣視之氣衝起腹間者二其大如臂刺其一蒼然鳴又刺其一亦如之加以按摩疾遂愈長山徐嫗癰疾手足顛掉裸而走或歌或笑

漢卿刺其十指端出血而痊錢塘王氏女生瘰癧環頭及腋凡十九竅數破白瀝出將死矣漢卿爲剔竅
母深二寸其餘烙以火數日結痂愈山陰楊翁頃有疣如瓜大醉仆階下潰血不能止疣潰者必死漢卿
以藥糲其穴血卽止義烏陳氏子腹有塊捫之如嬰漢卿曰此腸癰也用大鍼灼而刺之入三寸許膿隨
鍼迸出有聲愈諸暨黃生背曲須杖行他醫皆以風治之漢卿曰血澀也刺兩足崑崙穴頃之投杖去其
捷效如此

王履字安道崑山人學醫於金華朱彥修盡得其術嘗謂張仲景傷寒論爲諸家祖後人不能出其範圍
且素問云傷寒爲病熱言常不言變至仲景始分寒熱然義猶未盡乃備常與變作傷寒立法考又謂陽
明篇無目痛少陰篇言胸背滿不言痛太陰篇無噎乾厥陰篇無囊縮必有脫簡乃取三百九十七法去
其重複者二百三十八條復增益之仍爲三百九十七法極論內外傷經旨異同併中風中暑辨名曰泝
洄集凡二十一篇又著百病鈎元二十卷醫韻統一百卷醫家宗之履工詩文兼善繪事嘗遊華山絕頂
作圖四十幅記四篇詩一百五十首爲時所稱自滑壽以下五人皆生於元至明初始卒

周顥建昌人無名字年十四得狂疾走南昌市中乞食語言無恆皆呼之曰顥及長有異狀數謁長官曰
告太平時天下寧謐人莫測也後南昌爲陳友諒所據顥避去太祖克南昌顥謁道左泊還金陵顥亦隨

至一日駕出顥來謁問何爲曰告太平自是屢以告太祖厭之命覆以巨缸積薪煨之薪盡啟視則無恙頂上出微汗而已太祖異之命寄食蔣山僧寺已而僧來訴顥與沙彌爭飯怒而不食且半月太祖往視顥顥無饑色乃賜盛饌食已閉室室中絕其粒一月比往視如故諸將士爭進酒饌茹而吐之太祖與共食則不吐太祖將征友諒問曰此行可乎對曰可曰彼已稱帝克之不亦難乎顥仰首眎天正容曰天上無他座太祖攜之行舟次安慶無風遣使問之曰行則有風遂命牽舟進須臾風大作直抵小孤太祖慮其妄言惑軍心使人守之至馬當見江豚戲水歎曰水怪見損人多守者以告太祖惡之投諸江師次湖口顥復來且乞食太祖與之食食已卽整衣作遠行狀遂辭去友諒旣平太祖遣使往廬山求之不得疑其仙去洪武中帝親撰周顥仙傳紀其事

張中字景華臨川人少應進士舉不第遂放情山水遇異人授數學談禍福多奇中太祖下南昌以鄧愈薦召至賜坐問曰予下豫章兵不血刃此邦之人其少息乎對曰未也旦夕此地當流血廬舍燬且盡鐵柱觀亦僅存一殿耳未幾指揮康泰反如其言尋又言國中大臣有變宜豫防至秋平章邵榮參政趙維祖伏甲北門爲亂事覺伏誅陳友諒圍南昌三月太祖伐之召問之曰五十日當大勝亥子之日獲其渠帥帝命從行舟次孤山無風不能進乃以洞元法祭之風大作遂遠鄱陽大戰湖中常遇春孤舟深入敵

舟圍之數重衆憂之曰無憂亥時當自出已而果然連戰大勝友諒中流矢死降其衆五萬自敗行至受降適五十日始南昌被圍帝問何日當解曰七月丙戌報至乃乙酉蓋術官算厯是月差一日實在丙戌也其占驗奇中多若此爲人謂介寡合與之言稍涉倫理輒亂以他語類佯狂玩世者嘗好戴鐵冠人稱爲鐵冠子云

張三丰遼東懿州人名全一一名君寶三丰其號也以其不飾邊幅又號張邈邈頤而偉龜形鶴背大耳圓目鬚髯如戟寒暑惟一衲一簑所睨升斗輒盡或數日一食或數月不食書經目不忘游處無恆或云能一日千里善嬉諧旁若無人嘗游武當諸巖壑語人曰此山異日必大興時五龍南巖紫霄俱燬於兵三丰與其徒去荆榛辟瓦礫創草廬居之已而舍去太祖故闢其名洪武二十四年遣使覓之不得後居寶雞之金臺觀一日自言當死留頤而逝縣人共棺殮之及葬開棺內有聲啟視則復活乃遊四川見蜀獻王復入武當歷襄漢踪跡益奇幻永樂中成祖遣給事中胡濙偕內侍朱祥齋璽書香幣往訪遍歷荒徼積數年不過乃命工部侍郎郭璉隆平侯張信等督丁夫三十餘萬人大營武當宮觀費以百萬計旣成賜名太和太岳山設官鑄印以守竟符三丰言或言三丰金時人元初與劉秉忠同師後學道於鹿邑之太清宮然皆不可考天順三年英宗賜詔贈爲通微顯化真人終莫測其存亡也